

(9 di januari 1991)

Segun Tico Croes

MENTALIDAD MESQUINO TA STROBA FUNCIONAMIENTO DI DEMOCRACIA

ORANJESTAD (APA)

"Tin hopi argumento sano cu bo por usa pa debatí ariba e estado di democracia aki na Aruba. Asina bo por debatí ariba e contenido di democracia, y nificacion di democracia y hasta e rol di democracia den e progreso y bienestar di un país", Tico Croes a duna di conoce den un declaracion emití na medionan di comunicacion.

E ta bisa cu hopi ta esnan cu ta puntra con por ta posible cu den region tin asina hopi situacion di dictadura y despotismo, mientras cu e tendencia mundial ta pa mas apertura pa mas participacion, pa mas democracia. E punto ta, segun e hoben politico, cu democracia no ta un metodo, o un tecnica cu bo por scirbié ariba un pida papel, den un constitucion y den un reglamento di orden. "Surnam mes tabata tin un Constitucion, kisas mas bu-

nita scirbi cu esun di Aruba, cu un reglamento di orden di su Parlamento mihor desaroyá cu nos tin actualmente den nos Parlamento. Y apesar di tur e palabranan bunita Surnam a conoce dos golpi di estado. Awor ta e mentalidad democratico aki e miembronan di fraccion di MEP, y en especial Rudy Croes, ta carece di dje. No tin hustificacion pa e actitud anto-democratico di presidente di Parlamento. Y e hecho cu no tin argumento pa hustifica e actitud vergonoso di presidente di Parlamento ta sali na cla un biaha mas cu e articulo di Rudy Croes di ayera den medionan di comunicacion", Tico Croes a duna di conoce.

Segun el a sigui bisa, e articulo en cuestion ya hustifica e postura fuerte cu AVP a tuma di no participa den tripartite pasobra MEP a spera un posicion fuerte di AVP desde December pa e forma

anti democratico di proceder di e presidente di Staten y di miembronan di coalicion. Cu AVP no a tuma e decision aki na December sino awor na Januari ta demostrá con difícil tabata pa tuma un decision asina drastico. "Simplemente nos no por sinta banda di esnan cu ta skop nos for di Parlamento y ta ofende nos honor y dignidad y ta hasi insinuacionnan di mas baho cu por tin contra nos conciudadanonan y contra nos mes Staten", e parlamentario Tico Croes ta bisa.

E parlamentario Rudy Croes den declaracion haci anteriormente a duna di conoce cu AVP no sa ta den Staten. Riba esaki e miembro di fraccion di AVP, Tico Croes, a bisa cu esaki ta muestra cu Rudy Croes no ta compronde e trabou den Staten. E ta splica cu e tin numeroso ehemplo di reunion cu mayoria di miembronan di

fraccion di MEP no tabata presente y na unda diferente miembronan a sinta sin bisa un pia di palabra. Pero e ta kere cu mescos cu AVP, e partido geel ta reparti e trabou entre su miembronan. "Bai trabou no kier men traha. Bisa cu tur dia bo ta na Parlamento, y toch ningun hende no por localisa bo, no kier men traha", e la señala.

E ta spera cu e debate cu lo bai tin durante e reunion-

nan tri-partite riba e estado actual di democracia lo enfoca riba e tipo di mentalidad cu lo yuda nos país progresa y desaroyá, na unda tur hende por tin su opinion sin cu e tin miedo di represaya, na unda Aruba por drenta siglo 21 uni y den harmonia y na unda por enfrenta e retonan di desaroyo di decada 90 cu mesun orguyo y dignidad cu semper a caracterisá e pueblo di Aruba.